

CYPE(6)-04-22 - Papur i'w nodi 13

Lynne Neagle AS/MS
Y Dirprwy Weinidog Iechyd Meddwl a Llesiant
Deputy Minister for Mental Health and Wellbeing



Llywodraeth Cymru
Welsh Government

Ein cyf/Our ref MA/LN/0081/22

Jayne Bryant AS
Cadeirydd y Pwyllgor Plant, Pobl Ifanc ac
Addysg Senedd Cymru
Bae Caerdydd
Caerdydd
CF99 1SN

18 Ionawr 2022

Annwyl Jayne

Diolch am eich llythyr dyddiedig 17 Rhagfyr yn cadarnhau y bydd iechyd meddwl amenedigol yn parhau yn flaenoriaeth i'r Pwyllgor Plant, Pobl Ifanc ac Addysg yn ystod y tymor hwn ac yn gofyn am ddiweddariad ar y cynnydd hyd yma. Rwy'n croesawu'r pwyslais a roddir gan y Pwyllgor ar y maes hwn sydd hefyd yn flaenoriaeth allweddol imi fel y Dirprwy Weinidog Iechyd Meddwl a Llesiant.

Ysgrifennodd y Gweinidog Iechyd Meddwl, Llesiant a'r Gymraeg ar y pryd i'r Pwyllgor ym mis Mawrth 2021, gan roi diweddariad cynhwysfawr ar y cynnydd yn erbyn yr holl argymhellion mewn ymateb i adroddiad y Pwyllgor blaenorol ar Iechyd Meddwl Amenedigol yng Nghymru, a gyhoeddwyd ym mis Hydref 2017. Fel y dangoswyd yn y diweddariad, mae hwn yn faes lle y cafodd cynnydd sylweddol ei wneud ers cyhoeddi'r adroddiad hwnnw gan y Pwyllgor ym mis Hydref 2017. Mae Gweinidogion blaenorol wedi rhoi diweddariadau i'r Pwyllgor yn erbyn yr argymhellion a wnaed mewn ymateb i'r adroddiad hwnnw, a byddaf innau yn falch o barhau i wneud hynny. Fodd bynnag, o ganlyniad i'r effaith y mae'r amrywiolyn Omicron (COVID-19) yn ei chael ar y Gwasanaeth Iechyd Gwladol ar hyn o bryd, nid yw'n bosibl cynnwys cymaint o fanylder ag arfer yn y diweddariad diweddaraf hwn. Mae'n hanfodol yn awr fod y gweithlu clinigol amenedigol yn gallu rhoi blaenoriaeth i ddarparu gwasanaethau o ansawdd uchel i famau a theuluoedd, gan reoli'r heriau a achosir gan yr amrywiolyn Omicron ar yr un pryd. Er mwyn defnyddio capasiti clinigol y rheng flaen yn y ffordd orau posibl, nid yw swyddogion yn cynnwys aelodau o'r rhwydwaith iechyd meddwl amenedigol wrth gasglu gwybodaeth ar hyn o bryd oherwydd bod llawer ohonynt wedi cael eu neilltuo i ymgymryd â blaenoriaethau gwasanaethau clinigol. Fodd bynnag, byddaf yn rhoi diweddariad manylach i'r Pwyllgor cyn gynted â phosibl. Yn yr un modd, o ganlyniad i bwysau ar wasanaethau, nid yw'r ymarfer data a gynhaliwyd ddiwedd y flwyddyn a aeth heibio wedi'i gwblhau. Byddaf yn rhoi diweddariad llawn ar ddata gwasanaethau amenedigol maes o law.

Bae Caerdydd • Cardiff Bay
Caerdydd • Cardiff
CF99 1SN

Canolfan Cyswllt Cyntaf / First Point of Contact Centre:
0300 0604400

Gohebiaethlynne.neagle@llyw.cymru
Correspondence.lynne.neagle@gov.wales

Rydym yn croesawu derbyn gohebiaeth yn Gymraeg. Byddwn yn ateb gohebiaeth a dderbynnir yn Gymraeg yn Gymraeg ac ni fydd gohebu yn Gymraeg yn arwain at oedi.

We welcome receiving correspondence in Welsh. Any correspondence received in Welsh will be answered in Welsh and corresponding in Welsh will not lead to a delay in responding.

Gallaf roi diweddariad i'r Pwyllgor, fodd bynnag, ar amryw o feysydd. Mae Uned Mamau a Babanod Bwrdd Iechyd Prifysgol Bae Abertawe wedi bod ar agor ers mis Ebrill 2021, gan ddarparu gofal i famau sydd angen cymorth arbenigol. Mae swyddogion yn derbyn diweddariadau rheolaidd ar y defnydd o'r uned, ac mae hyn wedi bod yn gadarnhaol. Fel yr wyf wedi dweud cyn hyn, cynhelir adolygiad llawn o'r uned pan fydd wedi bod yn weithredol am 12 mis. Bydd yr adolygiad hwn yn penderfynu a yw'r gofal sy'n cael ei ddarparu yn bodloni'r galw presennol a'r galw a ragfynegir, a bydd yn pennu'r cynllun hirdymor ar gyfer gofal arbenigol yn y De. Gan fod y diweddariadau a roddwyd i Lywodraeth Cymru ar weithrediad yr uned eisoes wedi cadarnhau bod digon o alw yn y De, nid ystyried a oes angen uned fydd yr adolygiad. Bydd yr adolygiad yn canolbwyntio, yn hytrach, ar faint yr uned a'r gwasanaethau a gynigir, gan ystyried a ydy'n parhau i fod yn addas i'r diben yn y dyfodol.


Mae gwaith yn mynd rhagddo i sefydlu darpariaeth arbenigol ar gyfer menywod sy'n byw yn y Gogledd. Pwyllgor Gwasanaethau Iechyd Arbenigol Cymru (WHSSC) sy'n arwain y gwaith o gomisiynu'r ddarpariaeth hon ar gyfer cleifion mewnol. Mae WHSSC yn gweithio gyda NHS England i gyd-ddatblygu Uned Mamau a Babanod, wyth gwely ar gyfer menywod sy'n byw yn y Gogledd. Rydym yn deall y bydd y gwaith o ailwampio'r uned hon yn cymryd 18 mis i'w gwblhau. Byddaf yn rhoi diweddariadau pellach ar y cynnydd mewn gohebiaeth yn y dyfodol.

Mae byrddau iechyd yn gweithio tuag at fodloni safonau ansawdd perthnasol Coleg Brenhinol y Seiciatryddion. Ar 27 Hydref 2021, cadarnheais fod tri bwrdd iechyd yn adrodd am swyddi staffio a ariennir a fyddai'n eu galluogi i gydymffurfio'n llawn â'r safonau staffio Math 1. Rydym yn parhau i weithio gyda'r byrddau iechyd hynny nad ydynt yn cydymffurfio'n llawn hyd yma a bydd hwn yn faes blaenoriaeth allweddol ar gyfer Cyllid Gwella Gwasanaethau eleni. Rwy'n cydnabod, fodd bynnag, yr effaith sylweddol y mae'r pandemig COVID-19 wedi'i chael ar wasanaethau, ac yn enwedig ar y gallu i recriwtio i swyddi arbenigol. Mewn diweddariadau yn y dyfodol, byddaf yn cadarnhau'r cynnydd a fydd wedi'i wneud o ran recriwtio staff i bob swydd a ariennir, a'r cynnydd ym mhob bwrdd iechyd o ran bodloni safonau staffio.

Mae pob bwrdd iechyd yng Nghymru bellach wedi ymrwymo i'r rhwydwaith ansawdd amenedigol, ac maent wedi adolygu'r cynnydd tuag at gyrraedd y safonau ehangach. Mae Byrddau Iechyd yn datblygu cynlluniau gweithredu ar gyfer meysydd lle y nodwyd bod angen gwella.

Mae gwaith yn parhau i wella dibynadwyedd data a gesglir ar wasanaethau iechyd meddwl amenedigol. Mae'r Rhwydwaith Iechyd Meddwl Amenedigol wedi cytuno ar nifer o eitemau data allweddol i'w casglu'n barhaus. Cyflwynwyd hyn i'r Bwrdd Canlyniadau a Mesurau Iechyd Meddwl ym mis Tachwedd 2021, ac mae gwaith yn mynd rhagddo i sicrhau y bydd casglu data amenedigol yn cyd-fynd â chasglu data iechyd meddwl ehangach. Yn y cyfamser, mae swyddogion wedi parhau i ofyn am ddiweddariadau rheolaidd gan wasanaethau ar eitemau data allweddol. Gan nad yw pob bwrdd iechyd wedi gallu ymateb i'r cais diweddaraf am ddata oherwydd y pwysau ar y gweithlu ar hyn o bryd, byddaf yn rhoi crynodeb o'r data hyn yn fy niweddariad nesaf.

Hoffwn ddiolch i'r Pwyllgor am ei sylw parhaus i iechyd meddwl amenedigol.



Lynne Neagle AS/MS

Y Dirprwy Weinidog Iechyd Meddwl a Llesiant
Deputy Minister for Mental Health and Wellbeing